


PAGTUKLAS TUNGKOL KAY JESUS

1



Sa Araling Ito'y Pag-aaralan Mo

**Pagkatuto mula sa Biblia
Ganap na kawastuan ng Biblia
Ang paksa ng Biblia
Mga tala sa Bagong Tipan tungkol kay
Jesus**

**Pagkatuto mula sa Karanasan
Karanasan ng iba
Sariling karanasan**

Maaari ba kitang matanong? Sino sa palagay mo si Jesus? May nagsasabing "Siya'y dakilang guro." Tinatawag din naman siya ng iba na isang propeta, pilosopo, isang diyos na kanluranin, o isang mabuting tao na dapat panundan.



Si Jesus nga'y dakilang guro at propeta, nguni't siya'y higit pa rito. Higit pa siya sa isang pilosopo o huwaran natin. Si Jesus ay hindi-taga-kanluran; kaya hindi siya matatawag na diyos ng kanluranin siya'y nabuhay sa Gitnang Silangan may 2,000 taon na ang nakalilipas; gayunman, angaw-angaw sa sanlibutan ang nagsasabing' nakikilala nila nang personal si Jesus. Ialalay nila ang kanilang buhay alang-alang sa simulain Niya. Sino ba Siya?

Pagkatuto Mula sa Biblia

Ganap na Kawastuan ng Biblia



Para matutuhan kung sino si Jesus, buksan natin ang aklat na may wastong tala ng kanyang buhay at mga turo — ang Biblia. Ang Biblia ay kalipunan ng 66 na aklat na sinulat ng mga 35 hanggang 40 lalaki.

Iba't iba ang gawain ng mga lalaking sumulat ng Biblia. May mga pala-aral, doktor, hari, propeta, saserdote, mangangalakal, mag sasaka, pastol, pinuno, at mangingisda.

Nabuhay sila sa iba't ibang panahon sa loob ng may 1,600 taon. Sila'y mabubuting lahat na pawang nagkakaisa sa mga bagay na ito:

- 1) Sila'y sumamba sa iisang Diyos — na tinatawag na Jehova — Lumikha ng sansinukod.
- 2) Sila'y pinagpahayagan ng Diyos at tumanggap ng Kanyang mensahe para sa sangkatauhan.
- 3) Sila'y sumulat ng mga bagay na ipinahayag sa kanila ng Diyos.



Sinubaybayan ng Diyos ang mga lalaking ito upang huwag magkamali habang sinusulat nila ang mga tala ng nakaraan, mga mangyayari pa, at ang pahayag Niya sa mga tao sa bawa't panahon at pangyayari. Maraming taon na ang nakaraan, ang mga sulat na kinasihan ng Diyos ay tinipon sa iisang aklat-ang Banal na Kasulatan o Ang Biblia.



2 Pedro 1:21. Sapagka't ang hula ng mga propeta ay hindi nagbuhat sa kalooban ng tao; ito'y galing sa Diyos at ipinahayag ng mga taong kinasihan ng Espiritu Santo.

Ang Biblia ay wastung-wasto sa bawa't pinakamaliit na bagay. Tumpak ang ulat pang-kasaysayan nito. Tama rin ayon sa agham. Ang tiyak na katuparan ng daan-daang hula tungkol sa mga bansa at mga tao ay nagpapatunay na ito nga ang Salita ng Diyos. Maaasahan natin ang sinasabi rito tungkol kay Jesus.

Ang Gagawin Mo

Kung hindi mo pa nababasa ang pahina 7 hanggang 10, gawin na ngayon bago sagutin ang mga tanong. Saka sulatan ng X ang tamang sagot sa mga tanong na ito:

1. Sino si Jesus?
 -a) Isang dakilang guro lamang.
 -b) Isang propeta.
 -k) Isang Diyos na kanluranin.
 -d) Isang higit na dakila kaysa guro, propeta, o pilosopo.
2. Saan tumira si Jesus?
 -a) Sa Europa.
 -b) Sa Gitnang Silangan.
 -k) Sa Kanluran.
3. Saan makasusumpung ng pinakawastong impormasyon tungkol kay Jesus?
 -a) Sa Biblia.
 -b) Sa kasaysayang Romano.
 -k) Sa pilosopong Griyego.
4. Lagyan ng pananda ang tatlong bagay na pinagkaisahan ng mga may-akda ng Biblia:
 -a) Sila'y magkakasabay na nabuhay.

-b) Sila'y sumamba sa iisang Diyos.
-k) Sila'y sumamba sa maraming diyus-diyusan.
-d) Nagpahayag sa kanila ang Diyos at binigyan sila ng Kanyang mga mensahe.
-e) Sumulat silang lahat ng anumang nais nila.
-g) Sumulat silang lahat ng sinabi sa kanila ng Diyos.
-h) May kamalian silang lahat sa kanilang isinulat.

Ang Paksa ng Biblia

Bakit napagsama-sama sa iisang aklat ang 66 na aklat, na sinulat ng may 40 lalaki sa loob ng 1,600 taon? Ito'y nangyari sapagka't iisa ang paksa nito. Magkakasama nilang ipinakikita sa atin ang iba't ibang bahagi ng iisang larawan. Iisa ang pangunahing paksa ng mga aklat pangkasaysayan, kautusan, awit, hula, talambuhay, at ang praktikal na turo sa Biblia ay may iisang paksa. Ito'y ang kaligtasang alok ng maibiging Diyos sa makasalanang tao.



Ang mga bahagi ng Biblia — ang matanda at Bagong Tipan — ay nagpapakita sa atin ng pangangailangan ng tao sa Tagapagilgtas at ito nga'y si Jesus. Ang Matandang Tipan, ay nagtataglay ng maraming hula tungkol sa Kanya.

Sinasabi sa atin ng Bagong Tipan ang pagparito ng Tagapagligtas at kung paano tayo maliligtas sa pamamagitan Niya. Ang paksa ng buong Biblia ay ang kaligtasan ng sangkatauhan na nakatuon kay Jesus, ang Manunubos ng sangkatauhan.

Ang Gagawin Mo

5. Ano ang pangunahing paksa ng Biblia?

....a) Kaligtasan sa pamamagitan ng mga batas.

....b) Kaligtasan ng makasalanan sa pamamagitan ng maibiging Diyos.

6. Aling bahagi ng Biblia ang may maraming hula tungkol sa darating na Tagapagligtas?

.....

7. Aling bahagi ng Biblia ang nagtatala ng buhay ng Tagapagligtas?


.....

Mga tala sa Bagong Tipan tungkol kay Jesus

Ang Bagong Tipan ay nagbibigay sa atin ng mga tala ng:

- 1) Buhay at mga turo ni Jesus
- 2) Iglesyang itinatag niya.
- 3) Mga tuntunin sa pagsunod kay Jesus.
- 4) Mga magaganap kaugnay ng pagbabalik ni Jesus.

Maaasahan natin ang ganap na kawastuhan ng Bagong Tipan. Ang Diyos ay pumili ng mga lalaking sumulat nito at kinasihan Niya sila sa bawa't pinakamaliit na bagay ng kanilang gawain. Tatlong bagay ang tumitiyak sa atin na totoo ang mga tala sa Bagong Tipan: 1) pagkasi ng Diyos, 2) patotoo ng mga may-akda na nakakita sa mga pangyayari; 3) ang maayos na pagsisiyasat ng mga katotohanan.




Sina Mateo, Marcos, Lucas, at Juan ang sumulat ng mga Ebanghelyong tinatawag sa kanilang pangalan. Ito ang unang apat na aklat ng Bagong Tipan. Mabuting Balita ang kahulugan ng Ebanghelyo. Ang mabuting balita ng pagparito ni Jesus, upang bigyan tayo ng buhay na walang hanggan, ay Siyang pinakamabuting balita.

Nakikita natin mula sa iba't ibang pananaw ang mga tao. Halimbawa, ang isa mong kakilala. Siya'y kapitbahay ng isa; sa iba nama'y kaibigan, at sa iba pa'y asawa, ama, at manggagawa. Lahat sila'y makasusulat tungkol sa iisang tao nguni't iba-iba ang pagpapahalaga at pagtanaw sa kanya.



Kinasihan ng Diyos sina Mateo, Marcos, Lucas, at Juan para isulat ang mabuting balita tungkol kay Jesus, mula sa iba't ibang pagtanaw. Si Jesus ay ipinakikita sa atin ni Mateo bilang Hari — apo ni Haring David at maghahari na may katuwiran sa sanlibutan.

Ipinakikita ni Marcos si Jesus bilang Alipin ng Diyos, gumaganap ng kalooban ng Diyos — ang naghihirap na Aliping tinukoy sa hula sa Matandang Tipan, na paririto upang mamatay para sa ating mga kasalanan.



Si Lucas ang mang-gagamot na Griyego, ay nagpakilala kay Jesus bilang Anak ng Tao — pinakahuwarang kinatawan ng sangkatauhan at siyang lunas sa mga sakit ng buong sangkatauhan.



Sinulat ni Juan ang kanyang Ebanghelyo upang makita natin si Jesus na Anak ng Diyos ang Tagapagligtas ng mundo. Ang aklat niya'y tala ng buhay ng isang lalaking nakikilala niya. Malapit na malapit siya kay Jesus. Sumulat si Juan bilang nakasaksi at nagpapatunay tungkol kay Jesus.



Layon niyang papaniwalaing lahat ng babasa ng kanyang ulat na si Jesus ay higit pa sa isang tao — Siya'y Diyos na nagkatawang-tao. At sinabi niyang lahat ng mananalig kay Jesus ay tatanggap ng buhay na walang hanggan. Ito ang dakilang pahayag at parang mahirap paniwalaan. Subali't habang binabasa natin ang sinulat ng ibang tagasunod ni Jesus tungkol sa kanya, makikita niyang nagkakaisa silang lahat. Totoo ang sinasabi nila tungkol kay Jesus.

Sina Mateo at Juan ay dalawa sa 12 alagad na tatlong taong nakasama ni Jesus sa kanyang paglilingkod. Inilarawan nila ang mga himalag ginawa Niya, itinala ang ilan sa Kanyang turo, at isinalaysay ang nasaksihang pagkamatay Niya at muling pagkabuhay. Pinatitibayan ni Juan na Diyos si Jesus at binibigyang-halaga ang pananalig sa Kanya. Sanay si Mateo sa mga kasulatang opisyal bago siya naging alagad. Maayos siyang naglahad ng katibayang si Jesus ang Haring hinulaan sa Matandang Tipan. Bumanggit siya ng mga hula at naging katuparan nito, tinukoy pati angkang pinagmulan ni Jesus, at inilarawan ang mga alintuntunin ng kanyang paghahari.

Si Marcos ay kabataang nakatira sa Jerusalem noong naroon si Jesus. Maaaring isa siya sa nakarinig sa pangangaral ni Jesus, nakita niya ang Kanyang mga himala, at nasaksihan din ang pagkapako sa krus. Naging malapit kay Pedro si Marcos at dito marahil natutuhan ang ilang maliit na bagay na inilakip sa kanyang ebanghelyo.

Si Lucas na manggagamot ay maingat na nagsiyasat tungkol kay Jesus. Dalawang aklat ang kanyang sinulat (ang kanyang Ebanghelyo at Mga Gawa) upang bigyan ang isang tanyag na kaibigan ng ganap na tala ng buhay ni Jesus at ng paglago ng Kanyang iglesya. Kinapanayam ni Lucas si Maria, ina ni Jesus, at marami pang iba upang matutuhan ang mahimalang pagkapanganak kay Jesus, ang Kanyang buhay, kamatayan, at muling pagkabuhay. Siniyasat niya ang maraming pagpapagaling ni Jesus at inilarawan ang tunay na naganap.

Ang mga sumulat ng iba pang aklat sa Bagong Tipan — sina Pedro, Santiago, Judas, at Pablo - ay may kakayahang sumulat tungkol kay Jesus. Tatlong taong nakasama ni Pedro ang Panginoon. Sina Santiago at Judas ay mga kapatid ni Jesus. Mahigpit na kaaway ni Jesus at ng kanyang mga tagasunod itong si Pablo Nguni't nakasalubong niya si Jesus at naging daan upang magbago ang kanyang buhay. Mula noon, ginugol ni Pablo ang kanyang buhay sa pagbabalita sa iba ng tungkol kay Jesus.

Kinasihan ng Diyos ang mga lalaking ito upang sumulat para sa atin (bukod sa mga taong nabuhay noon) ng kanilang nalalaman tungkol kay Jesus. Nagkakaisa ang ulat nila. Mula sa kanilang karanasan, sinasabi nila sa atin kung paano rin natin makikilala si Jesus at malalapas ang buhay na kahanga-hanggang kaloob Niya. Ang sabi ni Juan:

1 Juan 1:3. Ipinahahayag nga namin sa inyo ang aming nakita't narinig, upang makasama namin kayo sa pakikiisa sa Ama at sa kanyang Anak na si Jesu-Cristo.

Ang Gagawin Mo

8. Isaulo ang 1 Juan 1:3.
9. Sino ang sumulat ng apat na Ebanghelyo?
10. Sino ang manggagamot na sumulat tungkol kay Jesus matapos gumawa ng pagsisiyasat?
11. Sino ang kaaway ni Jesus na nabago nang makasalubong Siya sa katangitanging paraan?
12. Ano ang ulat sa Bagong Tipan tungkol kay Jesus?
 -a) Kalipunan ng mga alamat tungkol sa isang bayani ng unang siglo.
 -b) Ulat na nagpasalin-salin bago naisulat.
 -k) Talang sinulat ng mga taong nakakilala kay Jesus o nakabatid ng mga katotohanan matapos kausapin yaong nakakilala kay Jesus.

Pagkatuto mula sa Karanasan

Si Jesus ay buhay ngayon at makikilala natin siya ng sarilinan! Ito ang bahagi ng mabuting balita ng ebanghelyo. Ginagawa pa rin ni Jesus ang mga bagay katulad ng ginawa Niya para sa mga tao noong araw.

Karanasan ng iba

May alam ka ba na kilala ng personal si Jesus? Ito'y higit sa pagkaalam tungkol kay Jesus, o pagiging kaanib ng isang iglesyang Cristiano, o tinatawag na Cristiano. Ang pagkilala ng personal kay Jesus ay nagbabago ng buhay.



Angaw-angaw ang

mga taong tunay na kumikilala kay Jesus ngayon. Sila'y magagalak na Siya'y sabihin sa inyo. Ang ilan sa kanila'y nagsasabing:

“Dati ako’y nagagalit sa lahat, subali’t ng dumating si Jesus sa aking buhay ako’y binago Niya. Ngayon ay iniibig ko na ang mga tao at nais ko na silang tulungan.”

“Dati ako’y mayroong mabigat na pagkaka-sala subali’t ito’y inalis lahat ni Jesus nang idalangin ko sa kanya na ako’y patawarin sa aking mga kasalanan. Binigyan niya ako ng kagalakan, kapayapaan, at malinis na budhi.”

“Inalis ni Jesus ang lahat ng takot na nagpapahirap sa akin. Binigyan niya ako ng lakas na harapin ang aking suliranin.”

“Binigyan ni Jesus ng kahulugan ang aking buhay at isang layunin sa buhay.”

“Si Jesus ang katugunan sa lahat ng aking mga suliranin. Dinadala ko sa kanya sa panalangin ang lahat. Ipinakikita Niya kung ano ang aking gagawin at tinatagpo ang lahat ng aking pangangailangan.”

“Ako’y hindi na nalulumbay dahil si Jesus ay lagi kong kapiling.”

“Ako’y naging sugapa sa opyo, subali’t inalis ni Jesus ang pagnanasa ko sa mga opyo nang ibigay ko ang aking buhay sa Kanya.”

“Ako’y pinagaling ni Jesus ng maraming beses bilang sagot sa panalangin.”

Ang mga patotoong ito at sa libo-libong mga tao pa na tunay na nakakilala kay Jesus ngayon, ay nagpapahayag sa katotohanan ng sinalita ng Diyos:

Hebreo 13:8. Si Jesu-Cristo noong nakaraan ay Siya rin sa kasalukuyan at Siya rin magpakailanman.

Ang Gagawin Mo

13. Isaulo ang Hebreo 13:8.

14. *Isipin mo:* Kapag narinig mo ang mga tao na nagsasabi ng kanilang karanasan kay Jesus kagaya ng ating sinipi, ano sa palagay mo ito? Nais mo rin bang makilala si Jesus? Ang totoong patotoo ba na ito sa iyong palagay ay maaaring si Jesus ay maging katugunan sa ilan mong mga suliranin?

Sariling karanasan

Paano mo makikilalang mabuti si Jesus? Kung pag-aaralan mo ang Biblia. Masusumpungan mo roon ang kanyang buhay at turo.



Malalaman mo kung bakit siya naparito sa sanlibutan at ano ang ginawa niya para sa iyo. Sinasabi ng Biblia kung ano ang ginagawang ngayon ni Jesus at gagawin sa hinaharap. Matututuhan mo ang tungkol kay Jesus mula sa karanasan ng iba. Sa buong panahon, mula nang mabuhay rito sa lupa si Jesus, hanggang sa sandaling ito, natuklasan ng mga tao na si Jesus ay nagpapakilala sa mga mataos na nagnanais na makilala Siya. At higit sa lahat, makikilala mo Siya nang sarilinan at mararansan ang katunayan ng sinasabi ng Biblia.



Marahil ay matagal mo nang kilala si Jesus, o kaya hindi nabali-taang gaano ang tungkol sa Kanya. Maaari namang kilala mo na Siya at iniibig, o tulad ni Pablo —ang kaaway ni Jesus na nabago nang makasalubong si Jesus o maaaring salungat ka sa ebanghelyo. Anuman ang

nalalaman mo tungkol kay Jesus at anuman ang iyong damdamin sa kanya, inihanda ang mga araling ito upang tulungan ka na lalo Siyang makilala. Sa gayon, umaasa kami at nananangin na malalasang mo ang kahanga-hangang kapakinabangang bunga ng pakikipagkaibigan kay Jesus..

Ang Gagawin Mo

15. Para kanino nasulat ang mga araling ito?

-a) Doon sa nakakakilala kay Jesus.
-b) Doon sa di nakakakilala kay Jesus.
-k) Doon sa ibig makakilala kay Jesus.

16. Piliin ang tatlong pinakamabuting paraan upang matutuhan kung sino nga kaya si Jesus.

-a) Pag-aralan ang sinasabi ng Biblia tungkol sa kanya.
-b) Pag-aralan ang sinasabi ng ibang relihiyon.
-k) Pag-aralan ang pagkakatulad ng mga relihiyon.
-d) Pakinggan ang ginawa ni Jesus para sa mga taong nakakakilala sa kanya.
-e) Sarilinan mong kilalanin si Jesus.
-g) Pakinggan ang mga isipan tungkol sa kanya.
-h) Pakinggan ang sinasabi ng mga kaaway ni Jesus.

17. *Isipin mo:* Makatutulong ba sa iyo ang pagkabatid ng higit tungkol kay Jesus? Paano?

Markahan ang iyong mga sagot.

Unang Aralin — Mga Sagot

Ihambing ang iyong mga sagot sa nakasulat sa ibaba at bigyan ng antas ang sarili. Dapat kang magbigay ng 20 impormasyon (mahigit sa isa ang sagot sa 3 tanong). Kung mayroon kang 18 hanggang 20 tama, ang antas mo'y mahusay. Mula 14 hanggang 17 ay mabuti; 10 hanggang 13, katamtaman. Kung kulang sa 10 ang tama, basahing muli ang aralin hanggang matutuhan mong mabuti.

1. d) Isang higit na dakila kaysa guro, propeta, o pilosopo.
2. b) Sa Gitnang Silangan.
3. a) Sa Biblia.
4. b) Sila'y sumamba sa iisang Diyos.
 - d) Nagpahayag sa kanila ang Diyos at nagbigay sa kanila ng Kanyang mensahe.
 - g) Sumulat silang lahat ng sinabi sa kanila ng Diyos.
- 5) b) Kaligtasan ng makasalanan sa pamamagitan ng maibiging Diyos.
6. Ang Matandang Tipan.
7. Ang Bagong Tipan
9. Mateo, Marcos, Lucas at Juan.
10. Lucas
11. Pablo.
12. k) Ulat na sinulat ng mga taong nakakilala kay Jesus o nakabatid ng mga katotohanan matapos kausapin yaong nakakilala kay Jesus.
15. k) Doon sa ibig makakilala kay Jesus.
16. a) Pag-aralan ang sinasabi ng Biblia tungkol sa Kanya.
 - d) Pakinggan ang ginawa ni Jesus para sa mga taong nakakakilala sa Kanya.
 - e) Sarilinan mong kilalanin si Jesus.

Bilang ng tamang sagot Antas